

四庫全書

子部

欽定四庫全書

古今事文類聚外集卷四

元 富大用 編

王府官部

總王府官 附

傳 府尉 司馬  
文學 記室參軍

歷代沿革漢帝子為王王國置太傅相中尉各一人後  
每國置郎中令一人晉諸王國大國有三卿左右常  
侍侍郎梁皇弟皇子府置師長史司馬從事郎中諮

議及掾屬錄事記室中兵等參軍及文學主簿功曹等員嗣王府蕃王府則減後齊王位列大司馬上置師一人餘官大抵與梁不異隋親王置師友各一人文學二人長史司馬諮議參軍掾屬各一人主簿二人餘事功曹記室等各一人唐親王府傳一人諮議參軍及長史司馬掾屬主簿錄事諸曹各一人文學記室典籤各二人宋王府師傳係以兼官為之而無定員又有翊善直講贊讀記室及諸王宮大小教授

等官元止置傳府尉司馬文學記室參軍

傳漢高祖初置諸侯王有太傅輔導王魏晉因之宋齊  
梁陳皆為師後魏諸蕃王各有師傳北齊唯置師隋  
皇叔昆弟皇子為親王者置師唐因之開元改為傳  
五代後唐長興四年以秘書監劉贊為之宋有其官  
而無定員正三品元傳正四品掌師範輔導參議可  
否

府尉漢諸王國有王尉魏晉宋齊梁陳北齊並有中尉

隋因為尉唐因之置二人正九品下掌分判國司事  
宋無其官元置府尉從五品掌警嚴侍從檢校門禁  
總統府中事

司馬司馬主兵官宋齊諸王領鎮者各置一人梁陳後  
魏北齊隋竝與長史同置唐因之置一人從四品下  
掌統理府寮紀綱職務宋有其官名而無定員元司  
馬從六品掌同府尉之事

文學漢公府州郡並有文學魏諸王始有文學員晉宋

齊梁陳皆因之班第五從七品後魏六品上北齊因之隋唐親王府置二人從六品上掌讎校典籍侍從文章宋置元復舊制從七品

記室參軍漢三公及大將軍皆有記室令史主上章表奏板書記魏太祖輔漢以陳琳阮瑀管記室軍國書檄皆二人所作晉諸公及位從公已上並置宋諸公府置梁陳公府及王府皆置北齊因之隋唐親王嗣王府置掌表啟書疏宋太平興國中置政和中以參

軍行軍之際所稱詔除參軍字元復舊名正八品

古今事實

有召必至

以下  
係傳

皇太子彊求乞自退封東海王故重選官屬以杜林為  
傅從駕南巡狩時諸王傅數被引命或多交遊不得應  
詔惟林守慎有召必至特受賞賜又辭不受帝益重之

後漢

盡忠輒諫

吳儀字子羽南魯二宮初立儀以本職領魯王傅儀嫌上宮相近乃上疏以魯王兼資文武為國藩輔二宮宜有降殺正上下之序明教化之本書三四上為傅盡忠

動輒規諫

吳志

擇贊自傳

劉贊為秦王傅秦王從榮握兵而驕言者請置師傅以傳之大臣畏王請王自擇秦王即請贊拜秘書監為秦王傅贊泣曰禍將至矣

五代史



知儀必儉

吳儀為魯王權傅盡忠規諫事上勤與人恭不治產業  
不受施惠為屋舍才足自容鄰家有起大宅者權出望  
見問大室者誰左右對曰似吳儀家權曰儀儉必非也  
問果他家

吳志

治官廉節

以下係  
府尉

孔申公弟子為博士十餘人孔安國至臨淮太守徐偃  
為膠西中尉其治官皆有廉節稱其好學

史記

論語同異

淮陽王宣帝愛子器異其子欲以嗣王恃寵自驕乃用  
韋玄成為中尉以輔導之受詔與蕭望之等論五經同

異於石渠閣

三輔  
決錄

號將軍

梁孝王招延四方豪傑齊人公孫詭多奇計初見日賜

金官至中尉號公孫將軍

前漢

思中尉

邵弘字德裕時景帝為琅琊王請弘為中尉弘體素方嚴儀度甚偉雖私門接對悉委身隨使者潛至舍令使者進曰王有令弘徐理鬚冠屢俯伏盡禮然後讀之王與使者羣立瞻聽歎曰古人稱不愧于屋漏其邵中尉乎吾乃逆詐以試長者豈不陋哉王虛心受納忻宴言話晝夜無休弘乃上書諫王書讀三四瞿然失色後謂左右曰思邵中尉之言使人于今毛豎

前漢

母為王吏

王吉為昌邑中尉以數諫王得減死髡戒子孫毋為王國吏

方外司馬

以下係司馬

後魏王晞為常山王司馬在并州雖戎馬填閭未嘗以世務為累良辰美景嘯詠遨遊登山臨水以談燕為事士人謂之方外司馬

北史

驢府司驢

謝超宗為黃門郎以失儀出為南郡王中軍司馬人問

曰承有朝命定是何府趙宗怨望答曰不知是司馬為是司驢既是驢府正應為司驢有司奏以怨望免禁錮

十年

南史

諫王不法

蘇良嗣高宗時為周王府司馬王年少不法良嗣數諫甚見尊憚

吾子賴卿

劉悼之拜相王府司馬帝謂曰卿家忠孝吾子賴卿師

矩冀蓬在麻不扶而挺也

善詩賦

以下係文學

晉諸公贊扶風王年八歲聰明善詩賦中表奇之魏烈祖以為齊芳王文學

善辭藻

竟陵王子良開西邸招文學王僧孺虞羲丘國賓蕭文琰丘令楷江洪劉孝孫並以善辭藻游焉

不取貴遊

齊衡陽王好學善屬文武帝謂王儉曰衡陽王須文學  
當使華實相稱不得止取貴遊子弟而已乃以太子舍  
人蕭敷為文學南史

精選賓友

晉鄭表魏武帝初封諸子為侯精選賓友表與徐幹俱  
為臨菑文學

察王舉措

山中恭王褒每讀書文學左右常恐以精力為病數諫

止之然性所樂不能廢也文學方輔相與言曰受詔察  
王舉措有過當奏及有善亦宜以聞不可匿其美也遂  
共表稱陳袞美公聞之大驚責讓文學曰脩身自守常  
人之行耳而諸君乃以上聞適增其負累也

魏志

作富貴箴

以下係記  
室參軍

孫覺傳字莘老遷昌王府記室參軍王禮之問終身之  
戒覺為陳諸侯之孝作富貴箴

陳進退節



神宗封淮陽王。穎王韓維皆為記室參軍。王每事咨訪維，悉心以對。至拜起進退趨揖之容，皆陳其節。

四朝國史

專掌文疏

東海王越以孫惠為記室參軍，專掌文疏。每造書檄，越嘗驛馬催之，應命立成。

吳志

面叱巧令

竇偁為晉府記室，賈琰為判官。每諸王宗室宴集，琰怡聲下氣，褒讚捷給。偁曰：「賈氏子何巧言令色之甚獨！」

不愧於心邪

楊文公  
談苑

不可得而親疏

薛元敬薛收及族兄德音齊名世稱河東三鳳收為長  
雛德音驚驚元敬年最少為鵷雛武德中為記室元敬  
謹畏未嘗申款曲於房杜如晦歎曰小記室不可得而  
親不可得而疎

不可有功名心

韓維字持國神宗初就外傳以維為王府記室神宗嘗

與維論天下事語及功名維曰人之功名因事始見人  
不可有功名心神宗稱善

國史

古今事文類聚外集卷四

欽定四庫全書

古今事文類聚外集卷五

元 富大用 編

節使部

節度使

歷代沿革古方伯連帥之職後漢劉虞為幽州牧就拜  
大司馬公孫瓚討烏桓詔令授虞節度晉伐吳詔王  
守受杜預王渾節度唐自武德至天寶以前邊防之

制其軍城鎮守捉皆有士而道有大將一人曰大總管已而又曰大都督至太宗時行軍征討曰大總管在其本道曰大都督自高宗永徽以後都督帶仕持節者謂之節度使然猶未以名官景雲二年以賀拔延似充河西節度使自此以後接乎開元天寶之間朔方隴右河東河西諸鎮皆置節度使緣邊之地凡八節度外任之重無比焉至德以後天下用兵中原刺史亦循其例受節度之別若諸州在節度使內者

皆節度焉宋節度使並兼管內官察處置等使以本  
州刺史長史為節度官察等使不臨本部者以它官  
知判州府事防禦團練使刺史不赴本任亦如之故  
事節度使不帶使相位在卿監下至乾德五年升節  
度使班在龍墀內金吾將軍上無定員恩數與執政  
同初除鎖院降麻禮尤異焉祖宗以待宗室近屬外  
戚國壻年勞久次若外任除殿帥始授此官亦止一  
員或有功勲顯著任帥守於外及前宰執拜者不輕

受政和以後宦官秉旄鉞者蓋八員戚里以濫恩破  
格橫選者亦時有之政和二年詔節度使以下更不  
帶持節字只稱某軍節度使元祐官品令節度使從  
三品元節度使正四品

羣書要語元戎十乘詩總元帥之任殿天子之邦六帖節

制諸侯糾繩列郡重鎮雄藩分麾授律建牙大任

分閫重寄轅門幕府將星人傑鎮撫方城

藩屏邦國外威夷狄內撫黎元作捍方隅以

將王室 有國柱石 予王爪牙 旌旗重寄 河洛

要冲 蘊佐命之才有經邦之任 偶唐虞之代立方

邵之勲

並同上

幢牙茸毒金巾柝羽旂旛旒

柳宗元集

寵任

麾鉞

楊炎志

入參廟筭出總師干

李受志

授鉞開府殿我南

邦

白集

設壇而拜授鉞而征持衛義之印即拜軍中授岑

彭之節行於閩外

元集

初司戎鉞

文集

限守戎律

同上

統節制

之師貞否臧之律撫其四封率彼五長

常集除節度志

旌惟進

善節以詰奸

同上

為王爪牙為國藩垣

韓愈上邢君牙書

擁節總



戎率身和衆

劉禹錫集

豹尾神旗素兜戟毒

韓文

龍旂四牡鈎

膺鏤錫命服有煒先君再揚

除集節度使碑

壽甲琱戈涇師以

往隼旟鷺尾涇俗以寧

涇原節度劉昌碑時昌為南郡王檢校僕射

鐵鉞琱

戈乃主夏盟山玄朱組以靖蜀京

李國貞碑

再麾飄飄而出

守十乘麟鞞以啟行

常集

龍節蜺旌降於天上鸞書翠軸

錫在掌中

同上

帥鉞將旄非功弗授

曲阜制

詩句紅旂將軍昨日歸

白居易注蒲鎮例駁紅旂

詔出未央宮登壇

近總戎上公周太保副相漢司空弓抱關西月旂翻渭

北風

岑參送李太保  
充渭北節度

古今事實

賜之旌節

唐節度使掌總軍旅顓誅殺初授具帑抹兵仗詣兵部

辭見觀察使亦如之辭日賜雙旌雙節行則建節樹六

纛中官祖送次一驛輒上聞

唐百官志

天寶中緣邊禦戎之

地置八節度使受命之日賜之旌節謂之節度使得以

專制軍事行則見節柱六纛外任之重無比焉

職官  
分紀

賜以樽勺

牛僧孺字思黯為山東道節度賜彝樽龍勺詔曰精金古器以比況君子

親王遙領

開元中剡王除安北大都護充安撫河東關內隴右諸藩部落大使親王遙領節度自此始

宰相遙領

開元十四年河西節度副大使知節度使蕭嵩除同中

書門下平章事節度如故宰相遙領節度自此始

父子更九鎮

唐柳仲郢父子更九鎮

同日踐兩鎮

李愬字元真帝方經畧隴右徙愬節度鳳翔李師道反  
詔愬武寧同日踐父兄兩鎮世以為榮

六遷大鎮

李晟克復市不易肆及愬平淮蔡復踵其美父子仍建

大勲兄弟藉父勲烈率以第宅相高惟愬六遷大鎮所處先人舊宅而已耳

四佩將印

王忠嗣為河西隴右節度使權朔方河東節度佩四將印勁兵重地控制萬里近世未有也

烏集榮戰

柳仲郢為太平軍節度使自拜諫議後每遷官羣烏大集於昇平里第庭柱榮戰架皆滿凡五日而散詔下家

人以為候除太平鳥不集

持節就第

自至德後方鎮降拜必遣內使持幢節就第

唐職林

入境築樓

唐節度使入境州縣築節樓迎以鼓角衙仗居前旌幢居中  
大將鳴珂金鉦鼓角居後州縣齎印迎于道左從事三日  
洗印視其利闕歲以八月考其治否銷兵為上考足食為中  
考邊功為下考

臥護北門

裴度為河東節度帝命盧弘宣諭曰為朕臥護北門可也

堪當閫寄

唐玄宗求良將委以河東河北之事問郭子儀子儀薦李光弼堪當閫寄

賞罰分明

封常清北庭都護持節伊西節度常清性勤儉耐勞苦

出軍乘騾私廐裁二馬賞罰分明

威令簡肅

李愿元和初為銀州等節度使威令簡肅甚得綏懷之術

政更寬恕

王周歷貝州涇州節度使涇州張彥澤為政苛虐民多流亡周乃更寬恕問民疾苦去苛弊二十餘事民皆復歸歷四鎮皆有善政



政代寬簡

張洪靜從節宣武承韓洪虐政代寬簡民便安之

秋毫無犯

郭子儀李晟為節度使收長安秋毫無犯

令嚴無犯

令狐彰拜滑毫魏博節度使當寇冲城邑墟榛彰躬訓吏下檢軍力之法令嚴無敢犯者田疇大闢庫委豐餘年時貢賦如期

頗有治名

薛嵩相為邢洺等州節度使方大亂後人亦厭禍嵩謹奉職頗有治名

更除繆政

安潛代高駢領西川節度使倚駢為奸利者潛誅之數年更除繆政

公退端居

段秀實拜涇原鄭穎節度使三四年間吐蕃不敢犯塞

清約率易遠近稱之非公會不聽樂飲酒私室無妓女  
無贏財公退之後端居靖慮而已

戎服待見

柳公綽使山南時牛僧孺罷相入江夏公綽具戎服於  
郵舍待之軍吏以漢上地高於鄂禮太過公綽曰奇章  
才離台席方鎮重宰相是尊朝廷也竟以戎容見之

為治嚴稜

裴玢授同州節度元和三年徙山南東道玢為治嚴稜

畏遠權勢不務貢奉蔬食敝衣居處取庇風雨而已倉庫充實百姓安之

未嘗贍索

徐申進嶺南節度使外藩歲以珠璣瑁香天犀浮海至申於常貢外未嘗贍索商賈饒盈

信懷義成

袁滋徙義成節度使滑用武地東臨淄北魏博滋嚴作而推誠信務在懷來李師道田季安畏服之居七年百

姓立祠祀祭

威震兩河

却士美討王承宗為大將王獻督萬人為前鋒獻恣橫  
士美斬以徇下鼓之大破賊憲宗曰固知士美能辦吾  
事承宗大震懼會詔班師威震兩河

斬失七軍

高宗文元和初為右神策行營節度使統諸鎮討西川  
劉闢至興元軍中有失旅店之七箸者斬以徇初闢擒

東川節度使李康及崇文克棣州而歸康求雪已罪崇文以康戰軍失守斬之

誅舞文吏

柳公綽為山南東道節度使行部至鄧縣有二吏犯法一賊賄一舞文縣令以公綽守法必殺賊吏獄具公綽判之曰賊吏犯法法在奸吏壞法法亡誅舞文者

斬朱泚使

韋臯為營田判官權知隴州畱後事朱泚既僭遂令家

僮使于臯又遣劉洵賓授臯鳳翔節度使臯俱斬以徇  
於是進臯為御史大夫隴州刺史置奉其軍節度使以  
旌之

行守珪令

張九齡為相范陽節度使張守珪以裨將安祿山討奚  
契丹大衮執送京師請行朝典九齡奏曰守珪軍令而  
行祿山不以克死

許民它遷

張延賞為淮南節度歲旱民宅遷吏禁之延賞曰抱此而斃不如適彼以生乃具舟遣之勅吏為脩室廬已逋債而歸者更增於舊瓜步舟車津湊而遙擊江南延賞請度屬揚州自是行無稽壅

禁俗不葬

李嵩檢校太原以北諸軍節度使太原俗為浮屠法死不葬以尸投山谷飼鳥獸號其地曰黃坑有狗數百頭習食胔頑為人患吏不敢禁嵩至遣捕羣狗殺之申厲



禁條遂革其風

西道遂通

李臯遷荆南節度使凡戰大小三十二取州五縣二十  
斬首三萬三千生擒萬六千未嘗敗師所過不敢伐桑  
棗踐禾稼朝廷仰食江淮而淮西道出九江至大別皆  
與賊接臯轉戰數千里餉路遂通江漢倚臯為固

南裔肅然

李復轉嶺南節度使時安南經畧使高平正張應繼卒

其佐李元度胡懷義等阻兵胥州縣肆為奸賊復至誘懷義杖死流元度南裔肅然教民作陶瓦鑄諭蠻獠收瓊州致都督府

自擇留後

杜牧追咎長慶以來朝廷措置亡術復失山東鉅封劇鎮地大者連州十餘小者猶兼三四故兵驕則逐帥帥強則叛上或父死子握兵而不肯代取捨由於士卒往往自擇將吏號為留後以邀命於朝天子力不能制因

而撫之謂之姑息之政姑息愈甚而兵將愈驕由是號令自出以相侵擊

唐兵志

號為債帥

唐忠武節度王沛死宰相裴度韋處厚以高瑀領忠武節度自大厯後擇帥悉出管軍中尉所輸貨者假貸富人後得所欲則椎髓斷膏倍以酬息十償六七及瑀有命士夫相告曰韋裴作相天下無債帥

降麻非故事

唐制節度使除僕射尚書侍郎者謂之納節皆不降麻止舍人院草制宋天禧中丁謂自保信軍節度使除吏部尚書參知政事先公在西閣草制政和中韓公自武康軍節度使除工部尚書三司使降麻非故事也

春明退朝錄

### 節度有三印

宋祥符中上覽河南節度使知許州石普奏狀用許州觀察印以問宰相王旦曰節度軍州有三印兵仗則節度判官掌書記推官署狀用節度印印之舊職則觀察

判官署狀用觀察印印之符制屬縣則大使判署用州

印印之同

上

三世節使

宋朝三世節度使一家吳璘子挺孫曦

四世節使

四世為節度使二家錢忱高祖俶曾祖惟演父景臻鄭  
藻大父紳父成之子與裔

五世節使

五世為節度使一家韓侂冑曾祖忠獻從子邈從孫同卿曾孫族

父子建節

父子建節十三家劉光世父延慶錢忱父景臻邢煥子孝楊韋淵子謙吳珍子拱吳璘子挺郭浩孫杲楊存中子俛劉錡父武仲吳益子琚琨吳蓋子瓌吳挺子曦

兄弟建節

兄弟建節七家吳玠弟璘錢忱弟恂韋謙弟謹吳益弟

蓋吳拱弟挺吳琚弟瑑李孝友弟孝純

古今文集

雜著

代郭子儀謝副元帥河中節度使表

邵說

寄深匡輔任切安危寵命過臨憂惶如灼臣某中謝臣  
智術凡淺才略無聞承日月之光遇風雲之會自奉先  
帝徇以馳驅被甲即戎載罹寒暑比憑朝筭克振天聲

雖毫髮之功曾無足紀竟不能掃蕩妖孽使八方攸同  
謬踐中樞仍叨上將分茅錫社榮貫一時悽悽之誠竊  
自增愧今又猥蒙驅策出鎮河中授臣以連帥之權委  
臣以專征之務雖才輕方召而任比桓文此陛下除奸  
之時乃微臣死難之日竊見自古忠義之士莫不扶危  
救禍憂國忘家雖在暮年猶思報主則廉頗強飯馬援  
據鞍以臣方之有甚前哲軍國事重不敢固辭誓竭股  
肱之力以副腹心之寄儻皇猷獲展寇難克平殞身戎



行實無所恨無任感恩

代郭子儀辭河東節度使表 邵說

祇拜休命內揣薄才委任專崇周章失據臣某中謝臣聞邊之安危係於所用事之成敗諒在先謀故寸璧必求良工尺錦亦資善製况夫謀無智勇備列戎旃自守封疆頗淹歲序肅將朝筭剪滅兇徒此乃天功匪惟臣力陛下不遺犬馬念以驅馳收其分寸之勞加以丘山之賞禮因位重恩與日深常恐顛危不克負荷所以非

有陳讓乞停范陽而手詔曲垂不蒙允許退就私室切  
愧明時素飡之詩自臣攸作今又更承獎命兼以河東  
邊境相連三千餘里烽燧列警斥候須明雖則居安終  
資有備以臣獨制謂必無失然以能處一事身任一官  
猶擇其人且愧曠職况臣旁綰三節控帶數藩智有所  
不周心有所不及兵權倘失奔駟寧追實慮授受乖宜  
簡書是畏特望矜臣不逮察臣愚謏更選良能付以旄  
鉞則樵夫絕議官序有倫

謝浙西節度使表

顏真卿

聖德含弘不遺簪履捨其罪戾假以麾幢感戴恩榮死  
生知報臣某中謝臣以為全吳舊國分閩重權煮東海  
以自資塹西河而作固九州天險之地六代帝王之都  
是以魏文興嗟甘從南北之限苻堅恃衆爰喪百萬之  
師豈不以形勝是先腹心斯切親賢重寄鎮遏攸難矧  
在庸微寧堪及此是以拜命之日以榮為憂制書以今  
月四日至饒州臣以今日發赴本道取都統節度觀察

使李峘處分訖即赴昇州即當繕修甲兵撫循將士觀  
察要害以備不虞假陛下英武之威守陛下聖明之理  
一心勦力上答天慈伏惟陛下察臣愚衷則死且不朽  
無任感戴屏營之至

代辭節度使表

汪藻

誤恩隆洽久蒙曠責之譏小已兢慚敢緩辭榮之請具  
輸愚懇仰冒隆威中謝伏念臣早濫褒揚浸階華近雖  
孤忠圖報誓糜殞以為期然晚節知非悟滿盈之可戒

昨侍言於帷幄祈休迹於田廬甫解煩機遽頒異數以  
章句小儒而竊授方之寵以斗升素志而叨制祿之優  
方渙號之已行固牢辭而莫獲坐貪名器荐歷歲時若  
猶冒昧以自如將至顛隳而靡悔伏望皇帝陛下特垂  
公聽俯諒忱辭鐫築壇節制之名守留鑰允釐之任豈  
獨少安于分願固將無累于恩私既聖度曲全許保益謙  
之終吉況天威未遠敢忘歸美之餘忠

代薛門下辭免節度使表 汪藻

引疾辭榮方幸機衡之解疏恩越等乃蒙旄節之頒凜  
如淵谷之臨莫測雲天之施輒布由衷之懇仰干方命  
之誅伏念臣承學闕如起家寒甚早被聖神之遇遂參  
丞弼之司黽勉十年周旋三省妨賢最久自知罪戾之  
盈容跡每安實賴恩憐之至比失衛生之理益懷誤國  
之憂力丐投閒僅蒙賜可所願退安於散秩敢圖併受  
於隆名惟齋鉞臨師本人主待有功之士而朝廷置使  
亦朝家優元老之臣顧平時猶懼于素飧豈病質乃堪

于徵使伏望皇帝陛下不忘舊物深諒微忠量才能小  
大之宜盡庇覆始終之意特回渙號靡速煩言未泯餘  
生尚可筋骸之強誓堅晚節仰酬體貌之優

真定府總管謝上表

張太傅

河朔雄藩戎昭重柄猥承選用俯愧踈愚蒞事方初撫  
躬增懼中謝伏念臣素無器業孤奉明恩自塵換秩之  
勞洊被董戎之寄西人外鎮累分經討之權北敵近邊  
即授撫綏之任曾微績效但擬僭尤顧擯棄以誠甘居

冗散而為戒敢冀皇明下燭寒灰復然召從江海之濱  
再立軒墀之下仍分戎柄兼處兵衝臣昨入侍禁廷及  
赴卑職將辭黼座親奉玉音憐其驅策辛勤察其遷徙  
頻併許令任且俾安居雖均勞逸之宜實被丁寧之  
誨此蓋伏遇皇帝陛下熙隆寶運維御羣才特推求舊  
之恩得展自新之效矧又不兼它局專治兵家惟紀律  
之素嚴寔詔條而慎守謹當愈堅成節曲盡訓齊無事  
之秋使懷忠而知勸臨敵之際則授命以忘身冀竭愚



忠上酬恩造

河西節度使廳壁記

楊炎

皇帝肇建節制之任位以上將主四方之兵濟河而西  
五侯四將十有六縣大海磅礴乎終始山河迴流其左  
右旄頭虎力之勁劍服穹廬之長煌煌乎長車千乘橫  
合萬里皆主乎是邦故秦已上為成都漢已下為巨防  
有城府襟帶焉有良將大勲焉有五都污雜焉其風悍  
其國險鮮車龍服囂然相蕩非古之戰守曷以成其業

而樹其風者哉昔在武德之初上用雄武大才則我隴  
西李王肅明乎神化大冢宰宇文公駙馬喬公出將我  
前軍中興之後循吏繼作則館陶侯郭公鸛鳩氏司馬  
公相國韋公蕭公庶績交修以被昇平之化當今王室  
多故雲海沸騰則僕射哥舒公以縱橫之奇判總軍國  
其意者將復用雄武大才乎君子曰武德之官神以略  
其化咸成中興之政儉以行其俗阜當今之理動以合  
而人安宜乎盡天下之才隨質文之變以永來裔大康

乎斯時天寶十二年夏六月記

邠州節度使廳記

鄭處晦

邠為古國其俗質而厚其人樸而易理業尚播種畜擾  
有后稷公劉之遺風始皇并天下地屬喬輔後漢析為  
新平郡後魏改置幽州國朝因之開元中詔以幽幽為  
疑因改為邠天寶已前太平歲久西通伊涼萬里而遠  
邠實為近郡申王薛王以親賢之貴居之太尉房公以  
盛德之重居之洎祿山勃起幽朔西戎塵坱湯湧乘艱

難際盜據河右蕃兵去王城不及五百里邠由是為邊  
郡斥候近郊鎮要害大厯中尚父汾陽王始以朔方軍  
壯其威容後益選武勇驍健有膽決奇謀者繼之今天  
子三年西戎款闕獻河湟數州故地西鄙益託邠為近  
藩上念兵戎方息邊備愈遠始詔司空白公由丞相府  
持節來鎮丞相功成繼命文雅忠恕之風煦然而起邊  
人若寢寤拭目心意蘇醒始知禮讓文化之為急務廷  
議以我季父尚書公前為夏帥夷貊乂安寇盜弭息儲

廩果實兵械果完懋賞休績遷鎮是軍季父又以理夏之政移之於邠邠人嬉嬉薰為太和嘗觀屋壁志前帥是軍者之名氏因曰曩之帥此者豈不知是邠始務公車而角材堅壘未暇及此爾吾既承數君子大理之後敢不勤督吾之未至者況今寇盜既夷不宜獨以鳴鼓鼙教擊刺為事因命疏自開元已來刺是郡帥是軍者追書於屋壁季父尚書公曰吾思將有以警于吾前警于吾後者邠之土實婦人無桑績不能自衣朔方之軍

雄男子勇於公戰無他業以自厚故郡之人以耕稼為  
事軍之卒以勇敢得賞後之撫于人者宜勉農畝時其  
徵調人不擾而完富矣帥于軍者宜嚴其刑賞時其衣  
食卒不驕而勇敢矣人既完富卒既勇敢生聚之訓練  
之吾知青海之西不數年為內郡矣命處晦記其終始  
序于前後處晦謹以季父之言志于後將永于後之人  
俾無怠大中二年三月日記

邠州節度使院壁記

李直方

自西漢始置幕府得顯辟士其聘舉之盛與公府置吏  
王國命官為比於是有班固傅毅崔駰蔡邕陳琳阮瑀  
之徒出焉大抵多巡禦封略經參戎事居無恒處秩靡  
常品故命之曰賓國朝篤方岳之任慎求其佐頒以職  
貢為之定制或辟自諸侯或降于朝廷皆命于天子其  
所司也調政教之和策軍筭之秘出入聘覲應對賓客  
其立署也行有戎次處有公堂與方伯周旋彌縫潤色  
而已王畿之腋劃為巨防外殿朝那作捍西羌中拱皇

都以臨諸夏漆沮之仁既遠華夷之俗相猶非瓌材英  
傑莫典封守非莊明純固莫參毗佐六年春皇帝勞韓  
侯牧圉之覲俾尹西夏申命御史中丞王君等九人為  
之使介既而師貞于律農勤其功惠和威武澤浸火烈  
孟秋述職曜兵河塞亭障蕭條千里晏清然後用虎旗  
蛇矛定功于蒲入覲皇都增秩受賜旋師舊服勲明德  
舉非元臣雄略能賢嘉績茂用濟此先是尚父郭公開  
府是邦搜賢勿二俊又咸集不十數年持樞衡治邦憲



司誥命者咸布職於清朝今韓侯亦能詳延端士輔相  
威德則是府將來宜為駿賢之郊數榮達之閭閭衛多  
君子邠其有之夫敬其事則命始春秋之誼也是邦當  
徵號朔方而以名師建為三郡肇基於我書事舉德宜  
始韓侯此記舊題於堂之北墉慮它日文字湮滅作者  
之文莫傳遂刻石以紀之李公自正字歷金吾掾廷評  
長安主簿遷監察殿中侍御史左司員外郎今為韶州  
刺史某早與公遊知公異時之大來也庶斯文之不泯

貞元二十年十月日記

鎮海軍使院記

羅隱

惟天子建國必維九牧九牧既序區分局署兩漢三公  
府有掾屬魏晉而降則置行臺若魏以秦王儀鎮中都  
高齊以辛術監治東徐州事皆行臺之任也其官屬則  
令僕以至于尚書丞郎唐制由行臺而置採訪使殆今  
節制之始也鎮海軍舊治京口大丞相以錢塘之衆東搃  
漢宏西殲逆朗天子不欲易其土故自符竹四命然後

移軍於錢塘生以物宜租賦以便斥去舊址廣以新規  
廓開閤閤拔起階級俾幢節之氣色貌武之出入得以  
周旋焉庚申年始闢大廳之西南以為賓從宴息之所  
左界飛樓右劇嚴城地聳勢峻約而有敞肥楹巨棟間  
架相稱雕煥之下朱紫冉冉非若越之今而潤之舊也  
疆場之事則議之於斯聘好之禮則接之於斯生民之  
疾痛則啓之於斯軍旅賞罰則參之於斯非徒以酒食  
駢羅而語言嘲謔者也其府屬以下或八都舊將或從

公于征或稟之於朝廷或拔之於鄉里故天子用青宮  
傳道之選以佐之輟教民論道之任以副之其餘省秩  
卿曹職領相次自我朝藩服官屬之盛無加也噫大丞  
相之勲德既藏之天府而攀鱗附翼者非鐫刻樂石其  
可久乎是年冬十月始命觀察判官羅隱記

### 防禦使

歷代沿革唐武后聖歷元年以夏州領防禦使防禦使  
之名自此始開元二年薛訥為隴右防禦使天寶中

安祿山犯順大郡要地當賊冲者置防禦守捉使代  
宗授田承嗣魏博等州都防禦使大率防禦隸所治  
州歲以八月考其治否以無虞為上考清苦為中考  
政戒為下考宋沿唐制置諸州防禦使元置諸路防  
禦使掌防制盜賊事

羣書要語朕之腹心

唐代宗  
永太制

兵防之任

同上

宜進厥位以

稱禦侮之實

荆公除  
皇姪制

禦侮之寄

曲阜除  
曲珍制

列位軍防

洪武  
除皇

伯克  
思制

正名閑禦之任

樂城除  
曹評制

爰思扞防之秩

龍溪  
制

升軍

禦之任增使節之華

胡文恭行  
李希及制

古今事實

敵不能犯

薛可言少帝即位遷澶州防禦使時契丹魏博遊騎晨  
夕至河上可言備豫有素敵不能犯

民皆便之

五代世宗時李王為安州防禦使治郡寬簡民皆便之  
吏民數百人詣監軍馮守規請立碑頌德詔中書舍人

富儀撰文賜之

州人立碑

郭玉世宗時為齊州防禦使歲不登以俸鈔分施饑民自隣境來者亦均給之人懷其惠相率詣闕頌其德政立碑

郡人立碑

宋李漢超為齊州防禦使郡人愛之求為立德政碑太祖詔徐鉉撰文賜之

邊夷畫像

楊旼字延昭為防禦使屢有邊功天下稱為楊無敵代  
北皆畫其像而事之云以禦鬼疾





古今事文類聚外集卷五

欽定四庫全書

子部

古今事文類聚外集卷六

詳校官中書臣沈颺

侍讀臣孫球覆勘

總校官編修臣王燕緒

校對官學正臣翁樹棠

謄錄監生臣任銜萱

欽定四庫全書

古今事文類聚外集卷六

元 富大用 編

統軍司部

都元帥 附

副元帥

歷代沿革元帥舊無其名左傳晉作三軍謀元帥雖有  
元帥之稱而非官名後周大象元年詔以上柱國為  
行軍元帥隋以親王為之唐凡親王總戎曰元帥文

武官總統則曰總管高祖定京師置左右元帥太原道行軍元帥西討元帥天寶末置天下兵馬元帥皆以親王領之又以大臣為副元帥大厯八年罷天下兵馬元帥建中四年以李希烈反置諸軍行營兵馬都元帥會昌中置靈夏六道元帥天復二年置諸道兵馬元帥尋復改曰天下兵馬元帥五代長興間加為天下兵馬大元帥錢俶在漢朝為東南面兵馬都元帥宋建隆元年加錢俶為天下兵馬大元帥元立

都元帥府掌征討之事有都元帥左右二副元帥左右二監軍又有檢法等員

羣書要語方叔元老克壯其猷

詩

晉作三軍謀元帥

左傳

古今事實

詩書元帥

晉作三軍謀元帥趙衰曰卻縠可臣亟聞其言矣說禮樂而敦詩書詩書義之府也禮樂德之則也德義利之本也

節度元勳

唐詔郭子儀李光弼等九節度之師討安慶緒帝以子儀光弼俱是元勳難相統屬故不立元帥

征討元帥

唐榮士琬為征討元帥高仙芝為副琬素雅稱風格秀整時士庶咸服焉

撫軍元帥

唐寧王琰英毅有才略善騎射每血戰在前時玄宗幸

蜀留肅宗討賊至靈武肅宗即位欲以廣平王為元子  
以琰為兵馬元帥左右曰廣平今未冊立艱難時人尤  
屬望於元帥況太子從曰撫軍守曰監國今之元帥撫  
軍也廣平為宜遂以廣平為元帥

玉冊金印

同光中以錢鏐為天下兵馬都元帥尚父尚書令封吳  
越國王賜玉冊金印

手詔勅書

唐代宗即位內官程元振忌嫉宿將郭子儀巧行離間請罷副元帥子儀既謝恩上表進肅宗所賜前後詔勅因自陳訴曰陛下曲垂惠獎念及勤勞貽臣詔書一千餘首聖旨微婉慰諭綢繆彰微臣一時之功誠子孫萬代之寶自靈武河北河南彭原廊坊河東鳳翔兩京絳州臣所經行賜手詔勅書凡二十卷昧死上進庶煩聽覽詔答曰朕不德不明俾大臣憂疑朕之過也

臨軒授鉞



德宗幸山南以渾瑊充朔方邠寧振武等道兼永平軍  
奉天行營兵馬副元帥上臨軒授鉞用漢拜韓信故事

上樓行禮

唐郭子儀自涇陽入朝帝御安福門待之命子儀樓上  
行朝見之禮宴賜隆厚

圖凌烟閣

唐德宗初為天下兵馬元帥封魯王時史朝義據東都  
代宗遣德宗會諸軍大舉破賊於洛陽朝義走河北分

命諸將追之俄而賊將斬朝義首以獻河北平以元帥功拜郭子儀等八人圖形於凌烟閣

創凌烟閣

昭宗末年中書奏西京舊有凌烟閣圖畫功臣今遷都洛陽合議脩建副元帥梁王勲庸冠世仍請凌烟閣側別創一閣以表殊勲從之

陳人退走

後周韋孝寬至淮南所在皆密送誠款謂五門尤為險

要陳人若開塘放水即津濟路絕孝寬遽守之陳刺史  
吳文立果遣決堰已無及於是陳人退走江北悉平

公柘授首

唐輔公柘據江東反命河間王孝恭為行軍元帥擊之  
將發宴諸將取水忽化為血在坐失色孝恭飲之曰此  
公柘授首之徵也衆服其識度後果擒公柘

有功遙統

開元十八年奚契丹犯塞肅宗時為忠王乃授河北道

元帥信王偉為副帥御史大夫李朝隱等八總管兵討之及諸將大破奚契丹肅宗以遙統之功加司徒

竟不臨戎

隋開皇十八年以漢王諒為行軍元帥水陸三十萬伐高麗諒至遼水師遇疾疫不利而還十九年突厥犯塞又以諒為行軍元帥竟不臨戎

清河江神

隋楊素為行軍元帥伐陳素率水軍東下舟艫蔽江旌

甲耀日素坐平乘大船容貌雄偉陳人望之曰清河公  
即江神也

兩浙尚父

唐詔曰朝廷每有將相恩命准往例列銜於勅牒後側  
書使字今兩浙節度使錢鏐是元帥尚父與使相名殊  
不合列署勅尾今後每署將相勅牒宜落下官位仍永  
為式

詔置寮屬

吳越正明三年詔授錢鏐諸道兵馬元帥四年置元帥府寮屬

遣將誓師

錢弘佐開運三年詔授東南兵馬都元帥李孺贇之求救也諸將皆不欲行弘佐因召文武官集議果言山水險惡不可興兵弘佐變色曰唇亡齒寒古之明戒吾為天下元帥豈不能恤隣若有異議者斬衆皆攝伏乃遣將誓師辭令明肅果有成功

## 監軍

歷代沿革史記司馬穰苴請以寵臣為監軍後漢光武使來歙監諸將晉武帝以刺史為監軍唐以宦者為監軍五代後唐亦有太原監元都元帥府有元帥左右二監軍亦掌征討之事

## 古今事實

### 銳卒遊軍

司馬文王征壽春使監軍石苞簡銳卒為遊軍

魏志

褰帳撫帝

後唐張承業為太原監軍常從征討王師既退汴營大將周德威慮其奔衝堅請退舍帝怒垂帳而寢諸將咸詣監軍請承業遽至牙門褰帳而入撫帝曰此非安寢時周德威老將洞識兵勢姑務萬全不可忽帝蹶然而興曰予方思之其夕遂收軍

五代史

斬徇驕貴

齊司馬穰苴將兵扞燕晉之師苴曰臣素卑賤願得君



之寵臣國之所尊以監軍景公使莊賈往苴與賈約會  
日中於軍門苴先馳至軍立表下漏賈素驕貴夕時乃  
至苴遂斬賈以徇三軍士皆震慄服之

史記

### 懲踰法禁

張承業為太原監軍武皇屬以後事曰吾兒孤弱羣庶  
縱橫後事公善籌之承業奉遺詔策畧居多莊宗感其  
意兄事之時諸王之貴介弟在晉陽宮或不以其道承  
業悉不聽踰法禁者必懲由是貴戚斂手

不與積錢

後唐莊宗時或有中傷監軍張承業於莊宗者言專弄威柄廣納賂遺莊宗歲時還晉陽宮省太后嘗置酒命典聖宮使繼岌為承業起舞既罷承業出寶帶幣馬奉之莊宗指錢積謂承業曰和哥繼岌小字無錢使七哥與此一積寶馬非殊惠也承業謝曰郎君歌舞承業自出已俸錢此錢是大王庫物准擬支贍三軍不敢以公物為私禮也

自劾矯詔

宋均為監軍時將軍馬援征漢南臨水軍士多病均懼  
衆疾疫矯詔迫降之諸將莫應均力勒兵圍賊詐為詔  
而降之為置長史而歸自劾矯詔之罪帝善之

止可委宮事

蕭復為相嘗言艱難以來始用宦者監軍權望太重是  
曹止可委宮掖事兵要政機難使參領帝不聽

不得干軍要

李德裕為相先是韓全義敗於蔡杜叔良敗於陳皆官人監軍制其權將不得專進退詔書一日三四下宰相不與又諸道銳兵驃士皆監軍取以自隨每督戰乘高建旗自表小不勝輒出旗去大兵隨以北由是王師所向多敗至討回鶻澤潞德裕奏請詔書付宰相乃下監軍不得干軍要自是號令分明將乃有功

口毀子儀

唐九節度圍賊相州以魚朝恩為觀軍容使郭子儀有

定天下之功居人臣第一朝恩心妒之乘相州敗醜為  
詆譖肅宗不納其語然猶罷子儀兵軍京師代宗立與  
程元振一口加毀帝未及寤子儀憂甚俄而吐蕃陷京  
師卒用其力王室再安朝恩內慙

天奪子布

張承業為太原監軍帝初獲玉璽諸將勸帝復唐正朔  
承業自太原急趨謁帝從容言曰今元凶未殄軍賊不  
克願殿下受人推戴悠悠之謀無益實事因泣下沾襟

帝曰予非所願奈諸將何承業自是多病日加危篤卒於官凶問至帝悲慟連日輟食因言曰天奪孤之子布也

招討使

附

副招討

歷代沿革唐貞元時置招討使自後隨用兵權置兵罷則停後以節度兼度支營田招討經畧使則有副使判官各一人五代後唐亦以招討使為都統之副宋因之元有招討使副招討

羣書要語前命相臣招懷撫矜而誥誤示以生門期於

盡脫網羅豈欲驅之陷穽而豺狼當道荆棘牽衣雖欲

歸之於仁厥路無由而至

元稹裴度制

一劍橫車萬夫莫前

陰則難窺勇則重閉亞夫緩急之任繼武絳侯祭遵禦

侮之才為吾子路

一品集王宰制

古今事實

兼招討使

唐德宗初即位建中二年田悅圍邢州次臨洛詔河東

節度使馬燧與昭義節度使李抱真神策將李晟合兵  
救臨洛悅兵大敗邢州圍亦解以功加僕射尋又加燧  
魏博招討使三年又敗悅於洹水詔加魏州大都督府  
長史兼魏博等四州節度觀察招討使

讓招討名

裴度受淮西宣慰招討處置使詔出度以韓弘為淮西  
行營都統不欲更為招討請祇稱宣慰處置使從之

賊鋒屢挫



來瑱為潁川郡太守充招討使肅宗以瑱武畧久加委任遷兼御史大夫比收河洛屢挫賊鋒頻來攻皆為瑱所敗賊等懼之號為來嚼鐵

籌畫皆出

五代後唐莊宗與郭崇韜謀討伐之計時明宗為諸道兵馬總管當行崇韜自以宦者相傾欲立大功以制之乃奏曰魏王繼岌德望日崇大功未著宜依故事以親王為元帥莊宗曰小兒幼稚安能獨行卿當擇其副崇

韜未奏莊宗曰無踰於卿乃以繼岌為都統崇韜為招討使率親軍六萬進討西川籌畫皆出崇韜繼岌承命而已

曰龍圖公

范仲淹知慶州兼經畧招討使未幾賊兵三萬叩城仲淹麾兵戰賊奔北遂戒諸將無追奔既而果有伏兵又奪馬為大順城及築細腰胡蘆等寨招明珠滅滅二強族萬餘人及命環州种世衡招千餘人久之王師再喪

於定州仲淹晝夜領兵為援初闕輔人心搖動及見仲淹耀兵號令嚴明威震戎落人心遂安第相賀曰邊上自有龍圖公為長城吾屬何憂

慕郭代公

慶厯三年以鄭戡代仲淹為四路都招討置府於涇嘗慨然慕郭代公功業元昊擁衆臨黑山戡勒兵巡邊抵鎮戎趨蓮花堡置酒高會旗幟絡野鐃鼓喧天虜衆十萬相顧不敢動元昊謂其下曰我已遣使稱臣朝廷何

為復用此公其畏如此

都統領

歷代沿革晉孝武帝太元十九年有河西大都統唐天寶末置為天下兵馬元帥都統朔方河南北平盧節度使都統之名始於此乾元元年戶部尚書李岷除都統淮南江東西節度使宣慰觀察處置等使都統之官始於此唐制或總五道或總三道上元末省大中後討徐州以康承訓討黃巢以荆王鐸為都統黃

策之難置諸道行營都統掌征伐兵罷則省雖總諸道兵馬不賜旌節宋諸軍都統制者自渡江已前亦有之然未嘗為官稱蓋是時陝西河東三路皆以武臣職高有智者為馬步軍副都總管遇出師征討則加以都統制軍馬之名非有司分也建炎元年置御營司遂擢王襄愍為都統制都統制名官自此始大槩南渡置統制一則兵興稱謂不一諸路起兵有自稱統制者州縣管押勤王兵者亦有稱統制者諸道

都總管及諸司便宜差統制者建炎初劉光世上言  
於是竝罷惟中都主兵朝廷差充統制者仍舊紹興  
十一年韓世忠張浚岳飛除樞密副使罷宣撫司其  
統制將副並改充御前隸樞密院各帶御前字入銜  
其兵馬就令所部統制官節制而都統皆以屯駐名  
冠軍額之上獨川陝如故嘉定初蜀叛既平安觀文  
又奏分興州十軍為沔利三軍沔州除都統制利州  
除副都統天下有十都統矣是年烏珠犯泗州詔樞

密使張俊於鎮江府置司措置江淮守備俊發張憲  
事併岳飛賜死俊遂薦其將定遠軍節度使田師中  
掌故岳飛之兵又薦清遠軍節度使王德往金陵於  
是竝詔為御前都制師中於鄂州德於建康府駐劄  
其後大軍又有統制同統制副統制統領同統領副  
統領等其下乃有正將副將準備將之名皆偏裨也  
舊制準備而上自主帥陞差仍先申樞密院定察紹  
熙四年詔江上陞差統制至準備將令主帥解發三

人赴總領所內選一名慶元三年詔陞差竝委主帥  
自是主帥之權復重矣元統軍司有統軍使統軍副  
使及都統領統領副統領知事之職

羣書要語元戎十乘以先啟行

詩

卻縠將上軍

左傳

長子

帥師

易

梁弘御戎

左傳

戎帥

楊朱克

節將

李衛

宜兼

李衛

領護

之權副師貞之吉

李若

幽制

執羈霸府盡忠肅之勤誠聳劍

元戎聲旄麾之茂績

張延

帥制

折衝之寄符玉帳而總金壇

同上

出總戎麾

杜佑

制

分委戎輅作鎮孟津

杜牧

牧行

授銅符

李班

冊



之律

上 緡制

執戎鈴以涖衆

杜黃棠制

往持戎律

陳敬壇制

權握兵

戎

計董昌制

建牙統衆必藉雄才

陸集劉洽制

出統戎旃

宋廣平集詔

來帥熊羆四方作儀

翰父

為戎臣師

同上

分命督將保寧疆

境

開元戒勵州牧將詔

詩句弓箭圍狐兔

韓

百萬貔貅趨玉帳三千賓客冠金

貂

羅隱上羅鄴王

古今事實

出鎮河中

郭子儀上元初詔為諸道兵馬都統令奉諸鎮之師徑抵范陽詔下旬日為魚朝恩所間事竟不行永泰元年以子儀都統河南節度使行營出鎮河中

分紀

蕩滌羣寇

乾符黃巢大掠江淮宰相王鐸曰臣忝宰相之長在朝不足分陛下之憂願自率諸軍蕩滌羣寇朝議然之乃

拜守司徒平章事荆南節度使諸道行營兵馬都統

唐會

要

意氣相期

太宗引尉遲敬德為右一府統軍左僕射屈突通等咸言敬德初歸國家情志未附請殺之太宗曰寡人所見有異遽命釋之引入卧内賜與金寶謂曰丈夫以意氣相期勿以小疑介意寡人終不聽讒言以害忠良今以此物相資表一時共事之情也是日因從獵於榆窠遇王世充領步騎數萬來戰世充驍將軍單雄信領騎直趨太宗敬德躍馬大呼橫刺雄信墜馬敬德翼太宗以出

賊圍太宗謂敬德功最多比衆人證公必叛天誘我意  
獨保明之福善有徵何相報之速也特賜金銀一篋恩  
盼日隆

官序相當

德宗幸梁洋回初廢天威軍左右神策軍舉西漢謁者  
隨何下淮南功拜為中尉故事命神策監軍為中尉又  
以功臣數多或有秩至司空僕射罷鎮入朝無官序相  
當乃置六軍統軍秩視六尚書為節制廻翔之地

分紀

柘臯敗金

李顯忠字君錫烏珠寇邊劉光世充三京等路宣撫使  
表公為本司前軍都統制上以宸翰賜公曰卿如立奇  
功與卿建節諸將會淮西戰于柘臯烏珠大敗公追至  
孔城奪耄倪之被擄者以萬計

言行錄

和尚原戰

丞相魏國張忠獻公浚烏珠欲窺蜀公令陝西都統制  
吳玠於鳳翔府之和尚原先處戰地誘致其來烏珠引

衆十餘萬來犯玠與敵戰凡三十餘陣烏珠中箭而遁  
俘其將楊格貝勒及部長三百甲殺敵衆橫屍滿野烏  
珠其衆損者過半皆吟呻扶攜以歸

同上

大人洲戰

李顯忠時金亮犯順公以池州都統移軍舒城除御營  
先鋒都統制堠騎報金兵萬人渡淮公領趙康年等與  
敵戰于大人洲首挫其鋒乘勝掩擊過淮敵軍溺死者

千餘人

同上

立功取節鉞

敵衆劉猊十萬已次于濠壽之間張浚拒之詔併以淮  
西軍屬浚沂中為張浚統制官浚遣沂中至泗州與浚  
合且使謂之曰上待統制厚宜及時立大功取節鉞或  
有差跌浚不敢私

言行錄

破敵復江州

和義楊郡王沂中傳李成叛江南招討使張浚議所以  
破賊王時為右軍統制官遂由上流徑絕生米渡出賊

不意遇其先鋒擊退之賊將馬進銳卒數萬來犯浚率  
步兵攻其前沂中乃將騎數千與神武後軍統制陳思  
恭出山後前後夾擊乃大破之遂復江州

同上

古今文集

雜著

張韓公廟碑銘

李遐叔

華

唐之元老有大庇於生人曰韓公公盡禮大朝位尊將  
相三城立廟軍帥乞靈則祠之天保季歲華奉使朔方



展敬祠下式瞻風采像與神合沉沉如生嗚呼生以公  
為臣歿以靈為神神乎宜奉公總戎疆外懸衡審政拒  
隴循河繇亘萬里堅城雄防扞蔽三輔介冑之士垂十  
萬人瞻我麾節以為進退先是突厥犯塞乘勝入朔方  
游騎至安定官軍不到經畧失守虜乃驅監牧之騾牝  
退存廬帳進圍聚邑鳴弓躍馬規復漠南邊人搥心元  
聖軫念節將更至咸以為請搢紳獻議則以和親為便  
中宗未之許也初以公耄老且重煩之及卜師於大宮

之庭唯公之吉至尊親臨前殿授以兵符公承命徂征  
北蕃逆駭記所謂君子有其時有其命公得其二而伸  
其一者也公忠貫神明慮幾造化鎮以長策潰其奸謀  
一麾偏師屠名王復喪馬奪塹拂雲維而城之竝阿之  
法列築三鎮將精士銳談笑就役匈奴莫敢南視雷哭  
而遁老幼望公以相震怖不然則乘冰轉鬪無日無之  
既而據河山翫其動靜納行旅歸之衽席憑墉而望匹  
馬單兵不匿形影虜由是械手足而剗腹心朝廷無草

竊之虞矣天下減征役之半矣詩云文武吉甫萬邦為  
憲又曰方叔元老克壯其猷公之謂也帳下之廝尚有  
存者曰公號令素嚴人無違禁自將吏騎卒咸有旌表  
節不常出出則賞罰隨之賞無非功罰無非罪上流而  
下競心行而事從謀全功成由此術也三城既就刊木  
標櫓記之種落刻其降年後皆知之豈挺生上將之龜  
策也竒鑒生物之然也夫鳥獸草木出其倫輩猶或利  
害憑焉况殊績功勲始終天地翼輔先聖寵綏元元有

茅社之尊符節之重後奉者果一勝遂一謀庸非聖明  
幽贊之效雅有吉甫薄伐至于太原王命南仲城彼朔  
方傳稱齊桓伐戎攘狄以其病燕滅衛魏絳和戎狄合  
諸侯從古及今以為大功其餘秦恬漢青之倫纔丘垤  
耳尚或筮頌颺之簡冊貴之况忠武卓異屢復今昔而  
詠歌無之非古也竊感趙孟懷隨武之德寤寐咏歎奉  
銘神宮其文曰

赫爾韓公同武有經受命北伐渠魁就刑敢或不順鼓

行風霆崇岱壓卵滄波灌螢沉泉雷動機發冥冥功奪  
三城人謠億齡謀出先後構危於寧張天之威恢廟之  
靈北敵頓顙山戎來庭萬里寢柝緣河罷扃趨拜故祠  
德謝惟馨翔野何有羣山青青感激遺風徘徊涕零吾  
誰與歸式薦斯銘

律詩

次潼關上都統相公  
韓愈

暫辭堂印執兵權盡管諸軍破賊年冠蓋相望催入相

待將功德格皇天

塞上贈王太尉

僧惠侶

飛將是驃姚行營已近遼河水堅度馬塞雪密藏鵬敗  
壘殘旗在全軍列帳遙傳呼更號令今夜取天驕

和聖製送石蒙都護兼鴻臚歸安西

王維

上卿增命服都護揚歸旆鳴笳瀚海曲按節陽關外落  
日下河源寒山靜秋塞無戰是天心天心同覆載

上裴行軍都統

耿 漳

胡塵已滅天山外，閉閣陰陰日復曛。  
櫪上華騮嘶鼓角，門前老將識風雲。  
旌旗四面高秋見，絲竹千家靜夜聞。  
莫道古來多計策，功成唯有李將軍。

贈趙將軍

孟 郊

當年膽畧已縱橫，每見妖星氣不平。  
身貴早登龍虎道，功名自拔鹿頭城。  
尋常得對論邊事，委曲承恩掌內兵。  
會取安西將報國，凌烟閣上早書名。

管軍總管

歷代沿革魏黃初始制都督諸州軍事後周改都督諸軍事為總管武帝時以王謙為益州總管總管之名始此隋文帝以并益荆揚四州置大總管其餘總管府置於諸州列為上中下三等加賜持節煬帝改帥都督為旅帥唐諸州復有總管亦加賜持節刺史亦加號持節武德初邊要之地亦置宋馬步軍都總管以節度使充副總管以觀察以下充有止一州者有數州



為一路者有帶兩路三路者或文臣知州則管勾軍

馬事舊相重臣亦為都總管

有禁兵駐泊其地者冠以駐泊之名

咸平

廢三路都總管景德詔鎮定兩路併為一路諸路並  
去行營之名止為駐泊總管慶厯三年詔近分陝西  
緣邊為四路各置經略安撫招討等使自今路分總  
管鈐轄以上許與都總管司同議軍事路分都監以  
下並聽都總管等節制違者以軍法論七年析河北  
四路各置都總管一員如無事止以安撫使總制諸

路八年諸州部置並改總管兵馬總管副總管

總管舊曰

部署英宗廟諱改焉有兵馬總管副總管凡武臣以諸司使以上充文臣以兩省五品以上充一州即為兵馬總管一路即為步軍總管副總管建炎元年李綱言守備當於沿

河沿淮沿江置帥府要郡以控扼其帥府文臣一員帶安撫使馬步軍都總管武臣一員充副總管改路分為副總管遇朝廷起兵則副總管為帥副鈐轄都監各以兵從出聽其節制正官願行者聽紹興二年要郡守臣罷帶兵職諸路副總管可依舊改充路分

鈴轄五年密院言東南多事合要近上官總領軍政  
乃詔兩浙江南荆湖福建廣東可依三路置總管於  
帥府七年淮東置總管十二年諸路並置州總管一  
員元有管軍總管其下有管軍上千戶管軍中下千  
戶管軍總把管軍上中下百戶等員

古今事實

當今名將

太宗曰當今名將惟李勣薛萬徹江夏道宗而已以青

丘道行軍總管伐高麗拔其城

任以藩岳

唐高祖詔黎州總管曹國公徐世勣本自黎陽擁徒歸順任以藩岳誠效克彰

遼東獻俘

李勣為遼東道行軍大總管率兵二萬執高藏男建等詔勣獻俘昭陵

定襄制敵

唐裴行儉為定襄道行軍大總管討突厥行儉曰以謀制敵可也因詐為糧軍軍伏壯士五輩又伏精兵踵其後虜果掠車壯士突討伏兵至殺獲幾盡

### 箭定天山

唐薛仁貴副鄭仁恭為鐵勒道行軍總管將行宴內殿帝曰古善射有穿七札者卿試以五甲射焉一發洞貫九姓衆十餘萬令驍騎來挑戰仁貴發三矢輒殺三人虜氣懾皆降軍中歌曰將軍三箭定天山將士長歌入

漢闕九姓遂衰

俘滅三國

蘇烈字定方為神丘道大總管討百濟俘其王義慈等  
所滅三國皆生執其王

軟血敗羌

膠東王道彥從李靖擊吐谷渾詔為赤水道總管帝厚  
以利啖党項使為鄉導其酋拓拔赤辭詣請自言隋擊  
吐谷渾我資其軍而隋無信反見仇剽今將軍若無他

我願資糧諸將與軼血遣之道彥至澗水見無備因掠其牛羊諸羌怨為赤辭所乘軍大敗

棄舟降銑

河間王孝恭信州總管蕭銑據江陵俄進荆湘道總管統水陸十二軍發夷陵破銑二鎮縱戰艦於江中諸將曰得舟當濟吾用棄之反資賊奈何孝恭曰銑之境南際嶺左薄洞庭地險士衆若城未拔而援至舟多何所用之今銑瀕江鎮戍見艦舟蔽江下必謂銑已敗不即

進兵覘候往返以引救期則吾拔江陵矣已而救兵到  
巴陵見船疑不進銑內外阻絕遂降

戰俘名王

李大亮為河東道大總管出北道與敵遇蜀渾山大戰  
破之俘其名王

戰獲可汗

襄邑王神符遷并州總管頡利可汗盜邊神符與戰汾  
東斬級五百獲馬二千及戰沙河獲乙利達官得可汗



所乘馬及鎧

擊下十城

李大亮擢金州總管府司馬王洪烈據襄陽詔大亮安撫樊鄧因圖之進擊下十餘城

進拔八城

契苾何力蓋蘇文死男生為弟所逐使子詣闕降乃拜何力為遼東道行軍大總管安撫大使經畧之副李勣同趨高麗勣已拔新城乘勝進拔八城引兵還與勣會

何力率兵五十萬先趨平壤虜其王以獻

便宜決事

裴寂受晉州道總管討賊以便宜決事賊將宋金剛據  
介州寂屯度索原賊埭水上流寂徒屯為賊所薄兵大潰  
宣布恩意

李靖授嶺南撫慰大使檢校桂州總管以嶺海陋遠久  
不見德非震威武示禮義則無以變風即率兵東巡所  
過問疾苦延見長老宣布天子恩意遠近懽服

威行域內

唐長孫晟為秦川道行軍總管出討突厥晟斬千餘級  
有達官來降言突厥大畏長孫總管聞其弓聲可謂霹  
靂見其走馬稱為閃電晉王笑曰將軍震怒威行域內

分紀

喋血虜庭

李靖為定襄道行軍大總管率勁騎三千由馬邑趨惡  
陽嶺頡利可汗大驚曰云云太宗曰靖以騎三千蹀血

虜庭遂取定襄古未有輦足漂吾渭水之恥矣

唐職林志

召詔入朝

泉男生授平壤道行軍大總管兼持節安撫大使舉哥  
勿南蘇倉巖等城以降帝命舍人李虔繹就軍慰勞賜  
袍帶金鈿七事明年詔入朝所過州縣傳舍作歌吹右  
羽林將軍李同以飛騎迎寵

先登報國

唐張士貴貞觀中為龔州道行軍總管太宗以其冒矢

石先登勞之曰嘗聞以忠報國者不顧身於公見之

璽書褒勞

郭孝恪馬耆王叛孝恪請擊之即拜西川道行軍總管  
率步騎三千出銀山道夜襲其王龍突騎支虜之帝悅  
降璽書褒勞

金瓶賜勞

秦叔寶事秦王府拜馬軍總管戰美良川破尉遲徵有  
功帝賜以黃金瓶勞曰卿不卹妻子而來歸我且又立

功使朕肉可食當割以啖爾況子女玉帛乎

賦詩祖道

張仁愿為朔方軍總管春還朝秋復督軍備邊帝為賦詩祖道賞賚不貲

請斷石嶺

竇靜請斷石嶺以障塞突厥去入

勇冠三軍

薛萬鈞為沃沮道行軍總管從李靖討吐谷渾復馳進

擊斬數千級勇冠三軍

職林

裂地獻俘

高麗莫支離男生為其弟所逐遣子乞師詔勦為遼東  
道行軍總管率兵三萬討之破其國執長藏男建等裂  
其地州縣之詔勦獻俘昭陵

同上

銳士深入

侯君集李靖討吐谷渾以君集為磧石道行軍總管君  
集曰王師已至賊不據險天贊我也若以精兵掩不備

彼不我虞必有大利靖然其計簡銳士約齊深入大戰破之

獨全軍歸

李靖為行軍總管以江淮兵萬人屯大谷時諸將多敗獨靖全軍歸俄權檢校安州大都督

率部落降

李勣為通漠道行軍總管出雲中與突厥戰走之引兵與李靖合因曰頡利若渡磧保於九姓果不可得我若



約齋薄之不戰縛虜矣文靖喜以與已合於是率衆夜發勦勒兵從之頡利欲走磧勦前屯磧曰不得度由是酋長率部落五萬降于勦拜大都督府長史

### 決策深入

吐谷渾寇邊李靖往見房玄齡曰吾雖老尚堪一行帝以為西海出軍大總管靖決策深入遂踰積石山大戰數千百人多降吐谷渾伏見自縊死

### 擊賊大奔

蘇烈擢伊麗道行軍大總管復征賀魯俟斤嬾獨祿擁衆萬帳降烈撫之賀魯率十姓兵十萬拒戰輕烈兵少舒左右翼包之烈令步卒據高攢稍外向賊三突步陣不能入因其亂擊之賊大奔

果莊遂降

姚弋字武之為環慶路馬步軍副總管改鄜延移果莊據洮州謀言青唐欲將兵由講珠梁會于洮合寇我疆兕自河州率兵破六逋宗城夜遣驍將縱火講珠梁明

日青唐兵至不得遂洮州之援果莊遂降

東都事畧

### 木征遂降

燕達為秦鳳路副總管河州景思立陷於踏白城達討

山後諸羌斬首四千級還至訶喏城木征遂降

同上

### 總領軍政

見前沿革

### 總治軍旅

哲宗正吏職官志總管鈐轄司掌總治軍旅屯戍營防守禦之政令凡將兵隸屬者訓練教閱賞罰之事皆掌

之續會要

機速專行

熙寧中詔諸路如遇出入之本司兵馬機速事申稟不  
及者副總管得專行

同上

機宜熟識

景德中以參政王欽若判天雄軍兼都總管初帝曰天  
雄且為重鎮思得熟識機宜行事果斷者涖之於是欽

若請行

分紀

燕達戰功

熙寧五年以燕達權發遣環慶路駐泊總管掌州之役  
達有戰功故自鈐轄躡遷總管然自資淺故令權發遣

自燕達始也

實錄

狄青材勇

狄青字漢臣京師呼為狄天使上嘉其材勇為涇原路  
兵馬副總管上欲一見之詔令入朝會寇逼平原乃令  
亟往涇原俾圖像以進上觀其儀表曰朕之闕張也於

是有狄萬人之稱以敵萬人也

札授方畧

宋淳化中以參政趙昌言為川陝兩路兵馬都總管太宗以蜀寇尚有殘孽會昌言安撫招討仍賜御札數幅

丁寧授以方畧委任雄盛

分紀

御賜秘畧

景祐四年以御製神武秘畧賜沿邊總管鈴轄每得代

更相授之

同上

遵裕知軍

熙寧五年上謂執政曰王韶經制饒洮獨高遵裕能叶力與都鈐轄如何王安石曰縱與權總管亦無害蔡挺曰如此即當罷知通遠軍蓋自來無總管離帥府而知軍州者上曰有事宜即出駐劄使知軍亦何妨安石曰總管知軍與鈐轄何異亦不須舊制有無也乃以遵裕知通遠軍權熙河總管

實錄

張劉再任

熙寧四年涇原路都總管張玉卨延劉永年並令再任  
玉與一子官樞密使文彥博曰兩人同是用而推恩不  
同上曰玉累有戰功永年但久熟卨延未有代之者若  
一槩推恩無以激勸

上言耶律惠

天聖七年劉平授忻州團練使屬上封事言趙元昊連  
姻耶律必為邊患授邠寧環慶副總管遣中人就賜黃  
金器



請持夏國臂

种子諤字子正李憲措置熙河邊事子諤廊延經畧總  
管秉常為母所囚子諤入對大言曰夏國無人秉常孺  
子臣請持夏國臂而來神宗壯之

東都  
事畧

古今文集

律詩

奉和幸望春宮送朔方軍大總管張亶詩

李嶠

玉塞微驕子金符命老臣三軍張武旆萬乘餞行輪  
猛氣凌幽朔崇恩降紫宸投醪還約士辭第本忘身  
露下鷹初擊風高雁欲賓方銷塞北祲還靜漠南塵

獻丘常侍總管


許渾

詔遣將軍護北戎身騎白馬臂彤弓柳營還識金貂貴  
榆塞遙知玉帳雄秋檻鼓鼙驚朔雪曉波旌纛起邊風  
蓬萊每望平安信應奏班超定遠功

贈淮西賈兵馬使

釋清江

破虜功成百戰場  
天書新拜漢中郎  
映門旌旆春風起  
對客絃歌白日長



古今事文類聚外集卷六